

列女卷之十三

王化之原閨門伊始子政宗經乃傳列女播彼
徽音昭茲懿嫩菊蘿有芬永霜無滓巾幗鬢眉
用光青史志列女

貞操

列國之風栢舟一詩居冠蓋以貞操風天下也
兩髦早逝嗣續無人而之死靡慝至并不見諒
於所生嗚呼難矣世傳望夫化石特寓言耳指
九天以爲正擬粼粼之白石又待化哉余傳列

女先述夫賢而無子者別曰貞操以附於詩首
栢舟之義焉

元

李氏安文妻也邑前此未有以節稱者有之自
李氏始舊志云夫早亡無子年止二十四以節
終延祐間表其間通志仍之 贊曰自金建邑
數百年列女獨傳李氏其湮沒不彰者可勝道
哉抑李氏所以獨存必難能可貴迥出尋常上
也舊傳祇數語殆亦聞其名未詳其實耶而後

此繼書者遂皆援以爲例至百餘人從同同無
乃畧不一考乎

明

王氏劉興妻興卒無所出父母謂曰若年少後
又無繼者將焉守氏泣曰孤寡之命賦之自天
天可逃乎譬曉百端終不能奪弘治五年邑人
列其狀以聞

李氏郝琮妻琮故渠陽望族矻矻嗜學早卒無
子氏設位一室中旦夕上食如生時每捧琮遺

書歎曰此手澤將誰寄耶則淚潛潛着紙嘉靖
十年旌其門

趙氏義官芮昂妻也昂意氣英發慨然思有所
建樹氏亦力左右之不幸早逝氏哭曰芮郎乃
止是耶罄資以斂製布衣縫素履服之終身冬
夏不易壽至八十餘嘉靖二十年旌表

劉氏牛勉妻年十九勉亡無子憑棺長慟欲以
身殉旣復念曰夫君新亡鬼猶求食誰與上冢
者每遇歲時薦饗輒伏地嗚咽不能起聞者悲

焉

陳氏歸苑弘祖止數月弘祖遽卒父母憐其無
依欲更嫁之氏聞卽投繯解救得蘇徐曰父母
憐女顧促女死耶父母知不可奪乃止苦節終
身鄉里嗟歎萬歷三十三年建坊旌表

劉氏邑庠生芮復堯妻故名家女少通書復堯
卒無出氏歎曰衛共姜晉令女何如人哉長齋
縞素以終其身鄰媪過之從未嘗一見齒也壽
至九十歲鄉黨奉爲女宗

張氏芮昌申妻年十七昌申卒惟遺一女抱之
啼曰夫亡無後有女何爲欲絕者數矣舅姑勸
之曰兒亡媳復殉兩老將何託耶乃收淚復治
事旦夕依舅姑側舅姑沒喪葬盡禮年至八十
有四天啓三年建坊旌表

潘氏例貢牛景浩妻年十八適景浩閱八年而
寡蓋崇禎五年也有子四周矣越數月亦殤氏
一意堅守集族尊請爲夫立後乃嗣堂姪鏢子
之禮以養以教朝夕敦勉之遂以康熙壬子科

選拔氏守節五十五年壽八十無疾終

國朝

芮氏廩生杜懋行妻懋行當明季卽有聲於庠
壬午與圍城中家毀遂空乏入

國朝抑鬱侘傺以死時氏年二十有八泣曰男女
雖殊所守一也夫子以守死未亡人敢不勉旃
舉宗義之立族孫承嗣氏以家學最後補博士
弟子員氏年至六十四全節終

鄧氏杜立善妻大學士立德弟婦也立善賈志

早卒氏年止十八清操自勵杜公旣貴誠婢女
輩侍鄧氏有加禮如太君稱氏曰我故處士婦
耳毋乃呼及見姪輩行家人禮則受之如平常
後撫姪孫以延夫祀至雍正二年旌表

見省志
補入

芮氏歸貢生牛文輝相敬如賓文輝授玉田教
諭未幾卒氏年止二十一曰夫子雖不幸遽殂
然備員學博學博所以明人倫也人倫始於夫
婦吾可不勉勵稱夫子志乎孀居六十三載禮
法肅然雍正四年當事聞於朝建坊旌之

萬氏庠生芮復興妻復興年少有才名娶氏伉
儷甚歡復興患不起執氏手唏噓曰若年甫十
七尚未及笄吾旦暮逝奈何氏流涕請先死復
興曰止恨苦若旣卒冰霜自勵凡四十五年嗣
姪之鵬訓誨入泮之鵬故復撫三歲孫恩寵及
垂革乃嘆曰吾今可以見芮郎矣乾隆元年旌
表 贊曰人亦有言死者復生生者不愧不愧
者謂有顏得相見耳初旣與余成言兮後悔遁
而有他九原如可作也面目將安施乎若萬氏

吾今可以見芮郎一語當令千古義士忠臣同聲一哭矣

何氏趙準妻準亡無子祖姑猶在堂氏與祖姑同卧起每日治膳畢則謹侍祖姑下氣柔聲宛然處女也奉祖姑命以姪爲嗣恩禮交至則又

儼然嚴師矣

邑志闕省志載之補入

曹氏貢生張天爵繼妻歸天爵日以文行相勗稱賢內助垂二載天爵卒未有出撫前母女如所生立姪士植爲嗣方三歲提携保抱式穀似

之性甘淡泊蔬食布衣以終其身後士植入成均恪守母訓勿敢替守節四十九年卒雍正十

二年旌表

亦見省志

李氏里民陳萬然妻雖生村莊中性惇篤知大義十九歲而寡誓苦守其隣舍或聞而笑曰貧家婦亦能守耶氏聞益勵食荼茹蘗垂五十年里人乃無不嘖嘖嘆者

盧氏庠生劉子健妻子健故貧士卒後家徒四壁立又乏繼嗣而氏心如鐵石以織紉自存活

所處境不堪其苦氏甘之如飴也比老力勤如
故里人賢之

王氏鼎呂女也幼嫻女訓適杜大學士次子典
簿恭璿舉案甚莊事姑孝恭璿卒無出氏哀毀
幾殆太夫人絕愛憐之視如女氏亦奉太夫人
如母久之以長房姪孫爲孫氏親自督課太夫
人卧病氏旦夕顙天願以身代性好善聞里黨
中貧乏輒周之而自御甚刻苦服縞茹蔬曰予
未亡人也於雍正八年建坊旌表

高氏庠生趙珣妻年二十餘珣卒無子子然一身足跡不越戶限中夜恒作嗚嗚聲隣舍皆爲悽惻然但聞其聲卒不見其人也年至六十有一以壽終

王氏里民李子鵬妻素有賢名夫卒氏年二十有七誓死守父母念其無子勸依養曰兒自有家且命孤不若孤處之爲稱也艱苦矢節歷五十餘年如一日

牛氏廩生楊紹曾妻紹曾亡氏年二十有九時

寶坻縣志 卷之三十一
家業凋零且膝下無子女氏勺飲不入口願以身殉姑命紹曾兄子芝發後之氏乃復食撫芝發恩勤備至守孀三十七載其艱苦有非人所堪者

楊氏康熙壬午舉人劉嵎繼妻壬子舉人居廣女也十八歲歸嵎不二年而寡歎曰兩家號孝廉家聲可自我墮耶僅留一老嫗外言不入於閩禮法森然訓前子七皆有成蘄繼父以雍正癸卯登賢書任泰興令

郝氏儒士馬作聖妻年二十有二無出作聖遭疾卒氏日夕號泣自求死舅姑再四勸慰容止戚戚首如飛蓬常以清淚洗面後作聖弟由聖生一子卽嗣之氏教訓有方老而愈健

孫氏里民劉雍妻雍卒或以去室諷峻拒之曰安所佐衣食曰指未斷如難給何曰心不轉諷者慚而退貧益劇守益堅鄉里以爲難

楊氏崔珏繼妻貢生周田之次媳也年二十有六夫卒無子姑素賢傷珏亡無能讀周田遺書

者見氏喪事縱縱中造次弗離於禮曰吾兒爲不死矣命姪繼其後氏撫教有恩法周田後讀書種子不絕楊氏力也崔門故多賢婦氏最著趙氏刑部郎趙之蘭女教諭楊亢子喬參妻也年十六于歸溫恭婉順亢夫婦喜曰真佳婦結褵方二載喬參卒止遺二女欲自絕恐傷二老心日勉治中饋夕抱二女暗泣枕畔常斑然漬淚痕旣以嫡堂姪郝爲嗣循循教訓三十四年於今矣

王氏趙衍宗妻生望族少習書通文義十五
衍宗事舅姑惟謹每勸衍宗勤學出妝奩廣購
書籍與之講貫人稱爲閨中益友年二十四衍
宗亡未有子息嗣長姪爲親授章句比弱冠學
漸成無何短折志愈勵獨與保姆居每覽古列
女傳則泣然流涕三十年來戚黨無不歎其貞
淑者 贊曰凡女之出望族者多挾富貴以驕
其夫家彼固未嫺大義也如王氏之事舅姑相
夫子殆動輒中禮矣乃衍宗旣亡嗣復短折致

所購之書僅以列女傳數篇灑未亡人之涕淚也悲夫

劉氏廩生陳思泰妻方二十一歲思泰亡日夕祈速死時舅姑老矣遂親族勉以大義乃強忍自存活歲饑嘗營甘旨奉堂上而自嚙糠粃執舅姑喪盡禮後撫族姪爲嗣守節四十二年而卒鄉黨道之多流涕者

何氏里民楊文然妻文然卒氏年二十有八家業蕭然一無依庇氏毅然固守日貧何害惟貧

乃見節耳食藜羹衣做絮晏如也其事舅姑以孝處妯娌以和楊氏族黨交口賢之

張氏里民李蘊高妻蘊高娶氏未三載遽病故時氏年二十有九赤貧如洗上有雙白下無嬰孩卽舅姑亦疑其必去氏固不去也守節三十五年沒齒無怨言

周氏里民馬于謙妻于歸十載雍容倡隨未嘗少戾于謙卒無出欲自裁念翁姑年高乃已不憚辛勤力代子職翁先卒姑依之尤若左右手

請于姑集親黨嗣姪楨齡以延夫祀乾隆六年
鄉里舉節知縣洪肇楸具文請旌

張氏儒士張慙妻也歸慙十餘年無所出夫卒
姑已六十有六常卧病一衣一飯因時增減未
嘗須臾去懷如是者數年終不怠時族無可推
嗣姑沒後始抱期歲姪撫之今增廣生慶雲也
氏已九十三歲距慙沒時六十三年矣

劉氏監生張其維妻年十八于歸甫一載而夫
卒無子翁姑俱年邁日相對痛哭曰老而喪子

何以生爲氏拭淚多方寬解之奉養二十餘年
二老轉忘其無子也嗣兩周姪倣祖恩如所生
閨門整肅守節已三十二年雖親戚亦稀見其
面人以爲知禮

趙氏劉敬宗妻敬宗本舊家子業儒氏十六于
歸從容敦勉敬宗志益奮不幸閱二年卒無出
氏欲自絕舉家勸不聽奉祖姑諭乃止初氏之
歸也不及逮事舅姑獨祖姑在祖姑曰此女端
淑惜吾孫貌不壽當累若早嫠耳已而果然及

祖姑病日夕祈禱含淚視湯藥竟不起氏仰天
長號風雲皆愴守貞三十餘年時以不獲再奉
祖姑訓爲痛云

張氏趙之璧妻之璧卒氏年甫十九幼子亦繼
殤依孀姑以守事如母歷今三十三年矣姑逾
九十矍鑠如常人慶之曰得吾媳樂甚恒忘年
撫姪爲嗣加意訓迪以勤儉示範姑姊妯娌皆
欽佩之

附

王貞女者貢生王澤世季女也生而端淑父母

絕愛之許字庠生單言子士一婚有日矣士一
遭母喪期乃寢未幾士一以居喪哀毀遂不起
女請往成服父母不許欲投繯乃勉聽之旣往
單亦憐其少也勸之歸堅執不移曰旣入此門
卽吾畢命處矣遂留屏掃一室縞衣素履誓以
終身聞者莫不驚歎當道多給額以旌邑前令
伍澤榮偕學博爲具啓徵詩哀然成帙 贊曰
謬哉毛西河之論貞女也由彼之言一若古未
有此者果爾則處女吟貞女引何自而傳哉且

請期納幣既有成言雖未婚身業有屬猶士之
尚未入官者耳未入官亦臣也遭逢變故初不
必定責以能守能守是尤可欽矣以人之不守
而轉訾能守者爲過情其賊夫名教也不已甚
乎余因聞王貞女事破例而特書之且以正西
河之謬論云

張氏李墅妻也父淳翁積皆庠彥雅相善以故
締姻年十五歸墅甫五月而墅卒孱焉在鬢髻
中日夕悲號形容銷毀時舅姑老無他子同居

惟一堂姪名塢者又甚幼家事莫能支氏勵志
食貧以供菽水翁先歿殮之成禮舉族哀其無
嗣會塢娶婦生二子議以其長嗣之未幾塢卒
塢婦并依於氏氏奉姑撫寡辛勤愈甚卒無怨
色

杜氏單鈞妻單爲累世善門鈞亦恂恂自好竟
不壽氏年方二十以翁姑年邁忍悲含淚堅志
守節立堂姪爲嗣水操淑行歷久彌篤其嗣子
乃今科乙丑庶常鐸子也

趙氏徐紹榮妻紹榮原籍山陰因祖父僑寓遂家焉氏歸方及笄事姑盡禮姑沒鬻衣飾以襄葬事凡九年紹榮卒竟無子有勸其易志者厲詞拒之立起蛟繼夫後今已五十四歲閱二十五載作苦不輟

劉氏庠生楊鈞繼妻鈞初娶陳氏生一女一子子彌月遂失母乃娶氏時氏年方十五撫子女如已出閱二年鈞捐舍氏泣日良人以孤委我若棄孤是夫祀自我斬也况舅姑俱在誰侍養

者勵節食貧孝慈兼著舅姑垂沒猶念不絕口
孤亦成立今已二十三年矣

按節婦例以三十年計我朝崇勵風化超越前古

特詔有司加意採訪會典內開婦女自三十歲以前
守節至五十歲以後者查明旌表逮雍正元年
欽奉

恩詔凡婦女守節十五載以上年逾四十而身故者
俱准旌是惟恐深山窮谷湮沒弗彰故并不拘
於三十年之成額恩至渥也顧民間開報究恐
年限未符致干駁詰其少年守節身故而無聞
者往往有之會余修志徧示四鄉核實陳舉除
未及二十年者尚當有待若距三十年之期無
幾則不論沒存亦得附書蓋請旌者朝廷之大
典不可稍輕入志者鄉黨之公評不容過刻凡
以仰體

皇仁且冀他日採風者之勿遺耳嗟嗟邑志不修七十餘年矣茲役後續舉未知何時旣明知其苦節而必斷斷焉以未及三十年未滿五十歲律之倘守貞少女溘先朝露將終不獲掛名簡端豈非予之重疚乎故附入李墅妻張氏以下數人其分見於孝行者做此

烈節

詩云穀則異室死則同穴古人於夫婦之誼如此乎其篤也所天旣喪而飲恨含悲至以身殉可不謂烈與若夫猝臨變故視死如歸用全大節抑亦所處使然也迨我

聖朝太平百年女子皆知守貞而秉禮故慷慨殉夫

不爲強暴所污者亦間有之而兵燹之禍釋然免矣君子於此可以觀世焉

明

三烈女者李堂李欒及劉聰之女也二李女皆名三姐劉女小字曰韓女兒正德八年大盜劉六劉七齊彥名等作亂畿輔間恣爲淫掠所至雞犬皆空三女皆年少有殊色賊掠得阱之一室中三烈女相抱痛哭云吾三人今日死耳義不爲賊辱誓結姊妹魂魄猶應聚一處也堂女

十七居首次聰女十六次樂女十五賊欲污之
三女同聲罵詈賊曰不從齒吾劍益罵曰吾輩
死有餘香不若賊奴萬段犬彘不食其餘也賊
怒支解之比死罵不絕口嘉靖戊午詔建祠祀
焉 贊曰義重於生一至此乎之三女者非必
生名門習女訓也乃一朝被難抗節不屈幾與
唯陽齒常山舌並傳千古斯亦奇矣明令胡與
之稱其正氣凜凜與日月爭光不虛耳立祠致
祭宜哉宜哉

褚氏

杜志訛諸
今從明志

郝經妻經本儒士就掾考鬱鬱

亡無子氏撫屍號慟絕粒數日不死尋自經嘉

靖二十二年旌其門知縣胡與之論曰褚氏與

夫同逝夫豈溝瀆之經已耶其情誠痛而其勢

激於不得已也後數年又有張氏殉夫之事

張氏楊世先妻也歸世先龜勉以相會世先疾

篤氏泣語曰君如不諱妾當相隨於九京及卒

氏三晝夜不絕聲已聞哭止視之則已就經矣

嘉靖壬戌知縣楊時芳立漏以旌之

本明唐志
杜志遺之

芮氏祁守道妻不知明何朝人有墓碑在縣南
大口屯鎮西北半里許久埋塵土中會大雨出
之其碑云祁守道二十歲嬰病捐世芮大姐絕
粒殉夫立碑旌表鄉里皆傳爲奇事

安氏兩淮運判陳以魁妻也崇禎九年城破氏
謂其媳張氏曰聞兵已深入玉石俱焚倉黃出
走必無存理而夫又遠宦他邦吾與若皆朝廷
命婦可苟活耶張氏泣曰謹受命媳請先氏覩
其婦就裁畢乃死孫女素貞亦死於祖母傍

芮氏諸生郝有光妻有光助守圍城久無援知
旦晚必不支一夕入謂其妻曰若曹自爲計吾
不復還矣氏曰君不負國妾敢負君有光徑去
不顧城陷死之氏率三女玉姐二姐三姐投於
三教堂前之河內母女更相攜以死

芮作楫之妻與馬貢璽之妻皆郝有謨女也姊
妹少相愛以古烈女自勗及居圍城期約以死
聞城陷作楫妻曰吾妹必死吾不可以後之既
而兩家人倉黃避難問二氏皆死矣時馬門又

有躍如妻郝氏亦同日死則郝靈女也

王氏芮圖南妻也圖南性至孝事急急負其母
出城不暇顧妻子途遇兵執其母圖南請代不
得俱死氏聞之慟哭赴水其一子一女皆泣曰
吾父死於母吾曹獨不能從母死耶同奮身躍
入水中

補

劉氏諸生郝翀妻城陷翀率兵巷戰就執不屈
死亂劍下氏聞抽利刃自刎其時郝門又有苑
氏者亦殉難蓋郝霞妻也

楊氏天啓辛酉舉人劉泰吉妻也泰吉事未詳
丙子後不復見惟傳氏殉節甚烈其時有劉餘
香者妻方氏亦以節烈稱餘香不知於泰吉何
行也本末亦無可考矣

李氏儒士牛景曜妻景曜早逝守孀二十餘年
以賢德著子二長鎬娶王氏次鑣娶李氏皆善
事姑會遇丙子兵變氏先叱二子出城乃泣謂
二媳曰而夫此去存亡未可知幸而存天也我
與若去將安之死耳二媳曰然媳兩人籌早決

矣卽促偕出并攜一孫二孫女至河干手投之
乃躍入最深處一時同盡後獨鍾得免圖其像
前令杜仁俊爲之贊云

王氏生員楊來復妻四來先生好善女也來復
早亡撫遺孤翻二十餘年得游庠及丙子七月

翻以募兵出十八日

家傳作
八月訛

城陷氏乃泣曰國

破家亡何以生爲親視媳袁氏投井畢其孫女
二幼孫四悉手勒死曰庶合門清節無一被辱
者矣乃從容自縊死後數日兵退井中袁氏尙

存自有傳 贊曰王氏已見前志但祇云撫孤
守節而不及殉難事然考邑中殉難者皆設位
三烈祠內王氏在焉余竊疑之會修志核實楊
之裔孫乃錄其遺狀以白余以是愈知前志之
諱言死事也嗟嗟楊王氏白矣而其餘同死者
又安必其皆有後耶且女之奉主於三烈祠者
雖不盡傳而其姓氏猶在若滅若沒間彼丈夫
之死事者何以都無可考耶黃土白楊沉埋千
古不知夜哭之鬼幾許也

按三烈祠內凡殉難者皆入焉今取其夫之姓
 氏可考者列諸傳此外則皆以門系之如張門
 則有節婦王氏郝氏芮氏節女張氏烈女登姐
 四姐王門則有烈婦李氏崔氏楊氏此必張奇
 勛兄弟王溥叔姪宗屬也郝門則見正傳外尙
 有孟郝牛氏仲郝芮氏季郝王氏又有郝門馬
 氏杜氏何郝氏之多烈耶陳門則自安氏張氏
 外又有二孫氏俱稱孺人及孫女陳大姐意以
 剛之昆季行歟馬門烈婦呂氏貞女存姐與二
 郝氏並稱矣芮門則有勅封太孺人趙氏烈婦
 二劉氏王氏薛氏從氏孫氏楊氏及貞女雙姐
 又楊氏及貞女桂姐李氏及側室劉氏若孝子
 芮圖南之母妻芮國太之母則自有傳也他若
 呂門則有郝氏暨貞女三姐又一馬氏一芮氏
 杜門則有烈婦韓氏趙氏陳氏芮氏吳門陳氏
 孟氏單門馬氏楊門田氏朱門張氏劉門孺人
 張氏馬氏王氏尹門杜氏趙門芮氏李門芮氏
 曹門李氏諸人今皆無可考非子姓之飄零卽

譜牒之淪沒特附標節烈後使有所託以垂諸
無窮或異日更有掇拾而表彰之者○祠在文
昌閣北祀三烈女本明令胡與之建也後因內
子兵燹殉節祠前并內及河內者皆設主於此
又設邑中烈婦貞女二虛位逮邑令薛文始增
義祀得與戊祭同日焉歲久不修僅存荒祠廢
主矣乾隆十年知縣洪肇楫修志既詳載各姓
氏於烈節中因葺宇而新之并捐置供具書額
曰芳魂猶在聯曰巾幗傲衣冠歎當年碧血青
燐風雨蕭蕭迷故壘帶帷留劍玦看此日冰心
玉骨烟雲靄
靄護靈祠

王氏里民楊二妻也二以油匠爲業崇禎庚午
詔浙兵入衛時軍無紀律有悍丁假察訪名窺
氏少艾因其夫出欲污之氏閉戶怒罵勢急遂

引刀自刎會兵燹後竟無有白其冤者至今人
猶以爲恨 贊曰吾觀王氏事而悲之因以知

明祚之必亡也大師壓境畿輔無援而遠徵浙
兵反恣淫暴至王氏慘死而莫白其冤時事尙
可問耶嗟嗟王氏不死於來攻之師而轉死於
爲衛之卒其義固與殉難者比烈矣

按庚午當
作壬午侯

再考

國朝

袁氏楊翹妻也翹少孤秉母訓弱冠游庠氏歸

奉孀姑盡孝會遭兵燹翻出募姑王氏命合家
殉難氏投井中數日矣以水淺竟不死兵過後
有目於井者乃得出翻亦生還抱持大哭恍如
隔世復生一子曰孝純未幾翻卒時家已蕩然
寸箸俱無氏備嘗艱苦孤子得立迨孫雍舉康
熙壬子解元己未成進士授翰林楊門蹶而復
振人謂天之所以報節母也

增

王氏庠生劉從玉妻從玉卒時氏年二十遺孤
方數月不忍絕夫後聊乳之然悲不自禁日出

卷之三十一
三十一
一勺米輒哽塞不下咽淚盡繼以血竟痛絕鄉人聞之皆爲隕涕爭劇錢育其孤

鄭氏岳家樓民尙文夏妻文夏亡無子伯叔逼之他適氏以死拒伯叔悉奪其有謂不堪寒餓終必去也氏節益堅恒掘草根雜糠粃食之衣不蔽體作勞霜雪中見者酸鼻歷年七十餘伯叔相顧語曰不信天壤間有如此耐苦嫗 贊曰予於無子而堅守者例入貞操獨移鄭氏於烈節何哉遭家不造伯叔見逼忍饑受凍歷數

十年其視計無復之而感憤自殺者爲更烈矣
嗚呼晚歲風霜不彫松柏如此嫗者庶其近之
尹氏本舊族女也美而賢十七適艾姓子甫半
載夫邁疾氏泣日期百日與君見矣意在完夫
葬也及夫卒有土豪求爲側室啗其翁姑聘百
金田一頃翁姑欣然許之氏聞驚泣自陳志此
曰兒亡能復養汝耶氏知莫挽佯聽命且曰願
翁收銀地畢媳卽行矣翁喜告土豪與訖氏乃
秉燭達旦若治裝者實暗拈針線縫綴遍體迎

之回則已服鹵斃矣土豪惶急願將銀地爲葬
費迨旣殯卽肆追索乃首諸官邑令黃志元往
驗時方炎暑啓棺顏如生異香護體志元急令
瘞之懲土豪令往祭給玉骨冰心四字額建坊
於墓 贊曰當文王時江漢風行猶有厭浥行
露之詩正以著女子守貞爲王化之極盛也如
尹氏一荒村小女子耳豪富委禽舅姑見逼卽
強而從焉其誰議諸顧能甘心畢命而不悔者
雖其天性固然哉抑激濁揚清其所漸被者久

矣蓋與周南貞女如一轍云

孝行

子事父母婦事舅姑同歸於孝婦以佐子者也
顧佐之而非以代之至於代之而不堪其苦也
甚矣分鸞別鵠形影煢煢而能茹荼將養飲泣
承歡豈不難哉蓋以節成孝卽以孝固節又與
他守節者有間矣若夫安居無事善侍舅姑乃
婦道之常不在此例也

明

芮氏廩生郝應聘妻應聘卒年甫二十歲二子
方嬰孩臨葬時投壙以殉舅姑救止之諭以大
義乃泣曰正恨生不能代子職耳然旣聞命矣
敢不勉自此養生送死克盡孝道苦節四十七
年而終萬歷三十一年建坊旌表

韓氏太學生苑時蓋妻蓋之沒也氏年十九耳
子在襁褓中而孀姑老矣念已死則姑無以自
存又絕夫後非孝也治喪畢竭力以事得其歡
心子稍長姑嘗謂曰爾他日有婦時願常以爾

母之事吾者告之氏壽至七十有三奉詔旌表
國朝

郝氏庠生苑肯堂妻肯堂少失怙事母孝無何
卒母撫其棺哭曰如我何又指其孤哭曰如雛
何氏聞歎未亡人之責方大也朝夕事姑惟謹
孤亦成立姑嘗曰假令吾子而在豈有過哉雖
然吾媳苦矣後年至七十有一乃終

張氏儒士劉賢妻賢卒上有老母下有穉兒而
家無升斗儲氏安貧守節勤紡織供菽水無間

寒暑姑未起具水漿伺榻旁夜則必伺姑睡熟乃退壽至八十親見其子若孫成立人以爲節孝報云

蔣氏陸河妻歸河事八旬老姑曲盡孝道年二十二河卒悲愴萬狀然懼傷姑心恒哽咽不出聲姑少食每抱兒置姑側博嬉笑以慰姑乃進一餐後兒漸長姑殂守節三十餘載康熙四十

四年旌表

見省志
邑志關

張氏常懷遠繼妻懷遠爲臨淮典史卒於官氏

年二十二生子甫兩月扶襯歸葬有老姑常臥
病氏宛轉牀蓐旁在視寒燠一夜十餘起久而
不倦爲前子娶韓氏得一孫復亡與媳共習針
黹以養姑後子與言漸成家孫繼先補博士弟
子雍正三年建坊旌之又年餘卒蓋七十有七
矣 贊曰懷遠以一命遠涉臨淮亦爲家貧親
老計耳而殞身異地旅襯空還悲哉向微張氏
則白髮高堂奄奄就斃矣氏乃盡孝於流離顛
沛之時一官莫養十指供之雖懷遠亦應感泣

於九京也

徐氏方成芝妻成芝於兄弟中最挺特顧不幸
早世孀姑年老例公養然氏獨善事姑姑亦願
與氏依居久之姑沒喪葬盡禮並不委諸妯娌
撫孤罄入泮自二十七守節歷三十九年而卒
雍正十二年旌表

齊氏里民崔深妻深卒時氏年甫十九孤子猶
在腹老姑常病奉侍不懈嘗調粉餌以進不食
則以乳乳之遺腹子稍長教課有方勵節垂四

十年鄉人公請旌表

孫氏里民劉君佇妻十七歲于歸閱十三年連
舉三子君佇卒舅姑年邁不能復治家氏拮据
操作旦夕無休時而堂上之供未嘗不潔舅姑
倚之怡然忘老歷四十年諸子漸次長督率愈
勤一鄉僉曰孝婦乾隆三年旌表

白氏牛景治妻景治有老母業儒賁志卒母甚
痛之氏哭母亦哭乃強自節哀嘗以衣拭淚通
體皆露時年二十九旣除喪所以慰高堂者無

卷之十三
三
不至教子讀書早游膠序守節三十四年六十
三歲壽終

李氏里民陳藻妻自十九歸藻持家勤儉事翁
姑卽以孝聞比三年夫故孤甫周氏以婦代子

問安視膳未嘗稍曠二老沒營治喪葬形神交
悴親戚有過慰者輒泣然曰恨先夫見背倉卒
不能成禮耳皆歎息而去苦節四十七年乾隆
元年旌表

韓氏庠生劉源深妻年二十八源深卒其父母

歎曰家門不幸隕我書香恒鬱鬱不樂氏勤紡
織以供饋復勉力令孤就塾歸則令背誦經書
於祖父母旁以慰老人懷孤嘉聲用是感奮年
少游庠至孫體乾亦入成均劉氏書香竟不隕
氏年至七十餘康強如故

王氏里民劉鳳彩妻歸鳳彩九年克勤克儉舅
姑交歎其賢夫卒事舅姑愈敬雖貧窶未嘗露
片詞惟恐傷舅姑心也迨子女皆婚嫁畢辛勤
備至而神明不衰年踰古稀里中咸呼爲劉太

母

馬氏里民田佩荃妻年二十有四佩荃將絕目不瞑氏泣曰念二老乎痛遺孤乎妾在必不負君乃瞑旣殯力貧作苦孝事舅姑迄喪葬皆如禮孤長列名庠序果一如與荃永訣時語也鄉黨共舉節孝請旌焉

張氏庠生劉善教妻年方及笄夫亡遺孤方八月乳哺在疚然奉養舅姑初不以委伯叔也舅姑亦樂就寡媳養曰若善事我迨喪葬竭力以

襄人皆難之後伯叔俱無子惟氏子名賢者連
舉數孫分嗣伯叔後氏老而愈健屬有天意焉
芮氏拔貢牛之澧妻之澧卒祖母潘氏尙在潘
氏哭曰吾牛門老寡婦辛苦至今女不哭我我
又哭女耶氏抱兩孫長跽祖姑前曰願無以卑
幼喪重長者戚潘氏曰賢哉知汝必能繼吾志
使此兩雛成立也乃輟哭及祖姑沒治喪盡禮
會弔者僉曰潘氏九十年清節不虛矣後氏年
亦踰九十督二子讀書皆有聲 贊曰昔人謂

讀陳情表而不下淚者其人必不孝觀之澧育
於祖母非所謂母孫二人更相爲命者耶而天
奪之算莫遂烏私其可哀也已芮氏以弱媳代
孫戀西山之餘暉樹北堂之萱草使九十年清
節得繼益彰嗚呼孝哉覽斯傳者宜不減讀陳
情表也

張氏里民陳士顯妻年二十五士顯卒翁姑皆
近七旬遺子二長者六齡次纔四齡耳家貧無
以給薪水常泮緝泲以佐養指裂血出不止也

越二年翁姑相繼告殂捨攘營葬負土成塋聞者悲之守節四十七年壽至七十有二

趙氏里民齊岩妻及笄歸岩克盡婦道生子甫周而岩沒屢慟絕已念舅姑逼桑榆齊門宗祀垂絕義宜守乃忍死爲奉養計時舅姑皆逾八旬艱步履氏掖扶未嘗去側久益虔教子之玉甚嚴整守節三十年其鄉人僉曰不愧吾里中人蓋氏所居故廣孝里也

倪氏方應春妻自十五歸應春年雖少一言動

俱中禮及二十三歲而寡舅姑憐氏益甚氏事
舅姑益恭治饌具必手薦旣徹乃敢嘗其孤兆
璞束髮受書一就試卽有文名由庠生入成均
以氏教有素也里人共舉其狀以聞

吳氏里民杜文學妻家甚窶無期功親文學卒
翁年七十餘氏方孕仰天祝曰杜後如不絕者
幸生子不然待翁天年亦隨死耳及產果子也
常勤十指易粟養老翁已所嘗大率草根木皮
類耳如是者三十餘年矣合鄉爲之悲惋 贊

曰余修志主於表彰苦節故新增列女大率寒
微家居多若吳氏者爲尤可憫矣祝天祈後朽
腹養翁豈獨甘荼如薺哉其視草根木皮直猶
薑桂辣梅蘭芬也奚悔焉

楊氏庠生張天申妻年十九適天申恭順莊敬
其舅姑交口曰仲婦也賢呼仲婦以天申行二
故也閱六年寡孝養不衰教孤子言動不苟舅
姑復曰仲婦也孝仲不死矣後其子士正名列
貢薦凡守節三十八年而終

傅氏里民張有充妻有充少孤獨與母居自娶
氏母喜得賢婦無何有充卒年二十六二子尙
幼氏蓬首垢面賃園半畝灌之或爲隣家分織
得升斗養姑其餘以哺兒所自食者半糠粃也
數十年初無悔意

方氏里民張德俊妻年二十六德俊亡屢欲殉
顧念堂上皤皤然膝下呱呱然心如刺日須延
此殘喘爲老幼計暑月霜天作苦不輟已常絕
粒而堂上供未嘗偶缺比姑沒猶歎無以報新

婦云

顧氏陳琮妻少嫻女訓歸琮事姑盡禮會琮卒子甚幼孝養不衰姑善病求之未嘗不在側居姑喪形容俱毀嘗謂人當艱難困阨時特患志不立耳名其子曰尙志後中雍正壬子科武舉氏年過七十猶健在

楊氏朱景通妻二十歲夫亡子纔八月氏誓不更適事翁姑視夫在時尤謹姑先卒助衰翁治喪心力交悴歷十有一年翁又沒棺衾粹無辦

卷之三
三二
將賣子以葬親族聞稍周之乃止織紉爲生者
歷三十年子得授室且抱孫焉

李氏庠生張玉麟妻本儒家女歸玉麟罄妝奩
以佐膏火每夕篝燈織聲與書聲間尤善事姑
夫卒子方五齡姑失明氏上食授衣曲如其意
事至八十五歲始終不衰子旣就傅夜歸令朗
誦曰自汝父歿後吾久不聞此聲矣今苦節四
十三年其子禮裕事母亦頗以孝聞鄉人擬其
概請旌焉

白氏里民李顯林妻歸顯林二年寡年二十有六姑已九旬龍鍾白髮支離床褥間氏跬步不離進湯水滌垢污無稍倦比沒盡禮盡哀人以爲難能遺孤森自三歲撫之以迄成人歷四十九年而卒乾隆二年請旌

李氏庠生王之玠妻夫卒氏年二十有八老姑衰病子敬方七歲好投石曲踊以爲戲氏扶掖其姑必呼敬侍左右比姑天年終竭蹶營後事鄉里咸稱其孝敬長以武額授衛千總乾隆四

年具陳母節旌焉

袁氏李進富妻年二十四方有娠進富卒姑已七十餘或勸改適厲詞拒冀待媿以延袁宗果得子時姑衰不能動履氏維持調護朝夕弗怠姑嘗語隣媪云老身非媳婦孝順久僵卧死矣聞者太息茹荼四十七年既奉姑至終爲子完娶李門遂有後

張氏里民陳璋妻生子甫及期年二十四夫卒舅姑俱六十餘時四壁蕭然生計乏絕氏勤十

指不貼席臥者數十年甘旨旣無缺於供少餘
卽以措後事其後舅姑繼沒歛具咸備不至臨
時匆遽者由能預爲計也子學鳴讀書雖未就
嘗訓曰守貧安分便是善良人傳以爲格言

張氏里民李燦新妻夫卒遺二孤俱幼冲不以
貧窮易節奉舅姑雖田間味必潔而進之迨相
繼終泣曰家貧不能成禮惟盡此區區而已勗
孤讀書長各授室邑前令伍澤榮額旌之今歷
四十四年壽垂七十矣

方氏里民張德峻妻年及笄夫卒家甚寒孤方四月翁姑俱逾六旬自傷窮獨閱月見氏左右就養如子在時悲心漸微經年則恬然自若矣後以壽終葬之成禮教孤有方且耕且讀前邑令伍澤榮亦給額以旌今苦節適符三十載例王氏呂永言妻十六歲歸永言比二十稱未亡人孤甫兩周上有翁姑貧困特甚而氏曲盡孝道菽水之供衣衾之費始終無失禮者皆紡織所出也孤長娶婦不幸短折哀慟欲絕憐幼孫

又鞠之作苦至老心血俱枯五十有九無疾終時康熙四十一年也家貧無力請旌至乾隆十年修志其曾孫庠生景端始以其事聞

周氏里民郭有棟妻年二十夫亡以舅姑在不忍去室撫周歲孤拮据營養恒忘其疲舅姑皆稱孝婦未幾相繼卒氏啼曰天旣喪我良人何又奪我舅姑之酷耶哭泣之聲悽動風雨後子稍長氏乃歎曰郭門自此不絕矣

張氏里民許曰政妻自十七歲歸曰政相夫十

餘年作苦御窮無戚戚色夫亡年二十有八姑
劉氏已七旬家無寸土懷周歲孤拮据謀養恨
不腆曰此豈所以娛老耶姑歿匍匐營殮淚爲
之枯今已三十一年備嘗萬苦

楊氏里民劉之華妻本邑中巨族十五于歸奩
頗豐而夫家僻處村落中環堵蕭然氏安之若
素事舅姑有加禮闋十年而寡則奩已罄矣孤
方四齡與老姑倚勤女紅佐養已常終日饑不
欲使姑聞也姑沒氏已六十猶致毀孤以節哀

勸不聽比八十一垂逝時口猶呼姑不絕云

曹氏里民紀邦安妻十四歲卽歸紀猶弱息耳
克嫺婦道宛轉侍姑未嘗少拂姑甚愛之歷十
五年而夫卒有子七齡欲絕粒以殉姑力諭乃
止繼有勸以他適者曰首可斷志不可易奉姑
益恭雖勞甚無瘁色迄沒思慕不衰子長服賈
山海關嘗以遠物遺輒嗚咽不忍食曰不及薦
吾姑也苦守三十八年齒六旬有七矣

張氏里民楊成妻夫亡氏年二十有一事翁姑

宛如子職翁沒喪葬皆如禮及姑病席地以待
聞呻吟聲卽起扶持之至於彌月竟霍然愈蓋
孝感也迄今三十五年姑尙無恙子亦漸成立

附

牛氏掾考許見龍妻年十七歸見龍時見龍兩
世俱無恙氏逮事各得其懽心會家業日落氏
典衣資鬻簪珥殆盡而見龍卒矣氏方二十七
兩孤日呱呱啼或諷以去室曰嘗恨人怕寒餓
失節寧自蹈之耶勤針縷易粟奉堂上餘以食
二子曰此許氏種也我則何有今年屆五十孤

漸長知爲人傭書以養母云

李氏儒士楊棠妻棠卒氏年二十有七事舅姑盡孝不以貧廢禮家乏婢女執爨負汲皆身親之未嘗言瘁遺孤二教之有方曰當不愧名門後也守孀二十六載清節甚著

尹氏貢生鄭國直妻國直卒氏年二十有六子珮尙幼毀棄服飾屏處室中長對鏡掩泣然旦夕必詣舅姑所敬問起居命之退乃退及沒治喪弔者皆稱知禮珮長入國學娶劉氏生孫一

珮又卒氏歎曰昔與孀姑居今並寡媳處撫子
不終又育孫焉未亡人之責豈有已哉今已四
十九歲矣

張氏儒士張錞妻年十六歸錞翁已沒孀姑猶
存錞出外則依姑而宿錞卒姑步履甚艱齒牙
俱脫氏扶掖惟謹每食必親奉雖家貧無所得
厚味要必投所好迄沒不衰雍正二三年邑被
水災女紅不贍日用恒挑野草食之今歷二十
五載鄉里以爲難

白氏吏員孫天佑妻十五歲適孫時家道猶饒
氏手治膳羞敬薦之不令他人代也及天佑卒
舅姑年俱七十餘遺孤方五歲家亦中落氏恪
供如故每夕焚香籲天爲舅姑祈年旣沒罄貲
以葬乃一貧如洗矣然氏嘗曰親喪固所自盡
留貲以薄親於心安乎今雖貧心安也勉子讀
書志節愈勵守已二十四年矣

懿範

杵臼之語程嬰曰死易立孤難耳惟女子之節

亦然門衰祚薄不絕若髮非有忍死撫孤者先
氏之鬼不其餒而保世亢宗其爲懿範也大矣
若乃安常履順而能助夫訓子者當不乏人然
舊志未載倘亦重立孤之意也歟

明

劉氏張九鼎妻九鼎疾篤謂氏曰數世單傳惟
此藐孤今以相屬孤存則守不存則聽若去耳
氏曰君勿憂孤亡妾亦亡矣後卒撫孤成立不
負其言嘉靖三年旌表 贊曰女辭家而適人

猶臣委身而致主孤亡與亡第矢此心金石可
貫也以是藐諸孤屬在大夫言猶在耳忍而委
之獨何心哉嗟嗟褚淵沈約諸人其愧於九鼎
之婦也多矣

從氏庠生芮允元妻允元刻苦勵學氏黽勉以
相有鷄鳴昧旦之風焉無何允元卒氏年僅二
十一撫孤備嘗艱苦每飲食必祝曰願夫子默
相以成君志壽至六十有九

劉氏光祿署正苑固妻固與昆弟圍因有苑氏

三鳳之目未竟設施而卒氏年二十有七常撫遺孤而泣比長訓曰若不能繼父志吾亦徒生耳孤念劬勞恩輒自奮至七十四壽終萬歷四十年建坊旌表

國朝

劉氏明天啓辛酉舉人王兆辰妻也兆辰承父好善家學才藻翩翩娶氏通詩書嫻禮教相得甚歡年二十六兆辰卒遺孤一長曰乃真次曰乃餘氏鞠育恩勤常述祖父德業以相勸曰爲

常人後易爲名人後難若無似則家聲頽淚隨
語下後乃真爲名諸生乃餘登順治甲午鄉薦
皆氏五十五年中所玉成也 贊曰箕裘弓冶
厥傳重焉彼明德之後而所生不類頽其家聲
者可勝悼哉爲常人後易爲名人後難信夫斯
言爲不朽矣渠陽王氏至四來益大迨兆辰云
亡先緒幾墮氏能以大義敦勉其孤繼繼繩繩
於今弗替詩云以似以續續古之人宜乎北王
後裔每稱祖妣而流涕也

張氏杜立言妻杜大學士弟婦也學士兄弟八人立言最先卒值明季兵燹常佩一刀曰有急當以此了之時居梁城幸不及撫孤恭訓勗以勤學早餼於庠以攻苦卒復誨姪入泮周旋妯娌間彬彬有禮無所卑亢壽至八旬餘康熙二十六年建坊旌表

張氏庠生芮伯祥妻伯祥卒氏年未三十遺三子孺然孤苦幾無以自存而氏不憚艱難抗心竭血以養以教俾俱有成孝義傳中維新其次

子也君子曰非賢母安得有此兒壽至九十有

二

王氏庠生芮應陽妻應陽卒家無擔石窘迫異
常氏猶勉力爲子具脯脩或以改業勸氏曰士
之子恒爲士貧乃士之常先業其可改乎敦勉
益力後子若孫同遊庠年至七十三而終當事
旌之

周氏庠生張奇業妻明考選推官奇勛之弟婦
也當明季奇勛兄弟多死於難獨奇業得免又

不幸早卒時氏年二十有六悲慟欲絕因有遺腹念張門百年宗祀堅忍以待已果舉子宿竭力撫之况瘁備至每爲子陳述先事則涕零如雨旣入泮訓誡有加年登上壽人謂張宗之絕而復續者氏一人力也 贊曰吾謁三烈祠見

丙子殉難者張門有王氏郝氏芮氏及烈女登姐四姐諸人悲哉張門其幾無噍類乎存者獨奇業耳又不幸早世祖宗血食如一縷然幸得氏賢奇業有後舉宗賴之其存孤之力大矣以

視諸殉節者豈有憾哉異日相見於九京應交讓氏之能爲其難也

王氏崔賢繼妻也賢前妻生子三氏歸復生一

子賢卒氏年二十有八子俱幼氏撫之均平如

一後漸長教甚嚴小有失已子則撻之諸子則

否但垂涕不食呼而泣曰吾不能爲若母矣諸

子叩首謝乃食其後俱遊於庠兄弟甚友愛氏

年垂七十而終前三子國祚國禎國祺其所生

則周田也國祚周田皆有傳國禎妻楊氏清節

類其姑

楊氏廩生崔國禎妻本名家女知書國禎卒氏年二十有六遺二孤旦暮卵翼之甫能言卽口授以字已令就傅一步一趨防閑惟謹常曰家學不傳猶無後也孤果勵學入泮氏以壽終

侯氏崔瑗妻端莊識大體年二十七夫卒子佳蕃纔二齡氏懿範肅然雖甚憐其孤而一言一動必繩以禮曰習慣成自然不可忽也自奉極儉約閭里有急難常周之每訓其子存心利物

繼前人忠厚緒壽至八十無疾終

丁氏儒士杜懋忠妻懋忠兄弟行皆蜚聲膠庠
忠獨以業儒卒氏深痛之孤永年方二齡誓死
以守比束髮以父書授旣補博士弟子益誠曰
顯晦未可知但能績學勵行卽不辱其先矣三
十四年中賢節甚著

杜氏歲貢單者昌繼妻大學士文端之從妹也
相夫以禮有孟德曜風者昌膺貢未幾卒二子
尙幼氏仔肩家務節衣食習勞苦以冀其成歷

五十年如一日初者昌與文端同學又戚屬也者昌既卒文端數存問其孤氏謂孤曰人貴自立耳豈藉庇乎汝曹勉之今單門世守家學鑑於乾隆壬戌成進士鐸以甲子乙丑聯捷皆氏曾孫行也人猶推本於昔日之懿訓云 贊曰積善餘慶瓜瓞綿綿殆有自哉者昌積學勵行費志以沒杜氏復以禮法訓勉諸孤識者早卜其後之必大矣人貴自立藉庇何爲不於其身必於其子孫所爭固不在目前也

傅氏庠生陳以慈妻以慈卒撫育諸孤劬勞萬
狀歲時設薦輒慟絕會宗人有宦歸者或謂緩
急可告氏戒其子曰兒曹不能自樹立而徒冀
受他人賜耶其志潔冰霜如此七十三乃終

張氏庠生苑人統妻人統才而貧旣卒氏年二
十有六室如縣磬而氏堅志守孤服用鬻殆盡
惟不鬻書日寧忍饑以留此手澤訓子之瑛入
泮年至七十四比卒猶重以安貧樂道爲囑云
楊氏太學生陳賡妻賡素性揮霍不能治生產

家道日落及卒氏年二十有八冰操自矢撫育
幼孤比長教以立身行己之道曰耐苦則節堅
安遇則心曠歷年七十而終

陳氏庠生芮引年妻少習經史以才女名于歸
未幾引年卒時方娠欲殉曰姑徐之若生女死
未晚已而得男力貧治生篝燈夜作間濡淚含
毫其凄清不減寡女操也子林生甫能言卽親
課之以母兼師得補博士弟子壽至八十一歲
建坊旌表

王門三節婦者王煇妻劉氏及其媳盧氏孫
苑氏也初煇亡遺孤國受方十齡劉氏苦身勞
形撫之成立娶盧氏亦賢淑生子禧七月而國
受卒劉悲不自勝盧氏曰媳請與姑俱守以延
王後更歷二十餘年爲禧娶苑氏事祖姑及姑
甚莊生子曰可久纔十歲而禧又卒矣時劉老
邁號曰自吾至王門而哭其父子孫三世獨不
死而久居此世何也與盧相抱而哭苑曰天哀
兩世清節此孤必無天理終當見其成也厥後

劉八十一歲壽終今遺孤又娶婦矣盧年九十
餘苑亦七十餘一門節孝遠近欽焉 贊曰以
節繼節以賢繼賢學士大夫家猶且難之况匹
婦乎邑青溝莊有王門者僻處村落中姑媳三
世以苦節著斯亦奇矣或疑累世單傳中道短
折天之酷王實甚然節萃一門聲傳四境又何
必非彼家之慶哉

孫氏庠生芮鉉妻德性溫恭事姑相夫必敬必
戒鉉卒年二十有四撫五歲孤世芳言動舉止

廸之以禮嘗言教小兒須要安詳恭敬則他日
氣質自不粗莽成童後約束益嚴故世芳得游
於庠雍正八年建坊旌表

周氏里民劉騰雲妻素有賢名騰雲卒氏撫一
周子性命以之嘗三旬九食而惟恐餒其兒既
成童令入塾曰雖村民亦須畧識字乃不至作
白丁也歷四十餘年家復完人謂大寒之後當
有陽春氏則曰我知自守而已安知寒與春

芮氏黃文寶妻十九歲適文寶逮事舅姑稱知

禮閱二年文寶邁疾叩天請以身代竟不起乃
撫三歲孤百方護卹之長則一動一言勗以寡
過四十年作苦未嘗一嘖然笑也

張氏里民盧文信妻文信亡孤止數歲窘迫異
常氏餐藜藿從風雨廬中鞠之既長爲娶婦甫
得孫而子又亡矣恐婦有去意竭力撫慰冀共
守以延一脉年至八十辛勤不改無何孫亦殂
嘆曰吾爲盧氏一塊肉至矣乃卒至此豈非天
哉竟以哭孫卒

里民劉世英妻也生子朝珍甫四齡而世
卒氏年方二十或憫其貧微諷之氏曰此三
尺孤可使謂他人父乎朝珍長娶崔氏且得孫
未彌月方喜後將日蕃珍又故媳年亦纔二十
耳與姑相依爲命合力操作媳勸老人宜少休
姑憐復助之劉門脉得復延崔氏先姑卒於雍
正五年其明年孫氏亦卒鄉黨哀之合詞請旌
時又有李門兩節婦云

李門兩節婦者子鳳妻王氏及其媳張氏也王

氏生子棟方數月子鳳暴亡斗室蕭然炊火常絕了無悔意待棟二十二歲乃娶張氏娶二年棟又卒王氏哭曰天乎天乎良人何罪未亡人又何罪而隕其嗣乎張氏含泪勸曰姑勿過悲媳幸有娠生子祚未斬也乃與姑俱守果生子名如檜今亦哀然丈夫矣張氏猶無恙而貧苦特甚鄉里悲之 贊曰徽音克嗣斯男兆焉詩人所頌美也乃若未逢其慶轉遘厥凶再世單傳孀居勵節將毋實命不猶歟獨是冰雪雙清

爲人世所僅有而此地王門三節婦外如劉如李同時鼎峙若聞聲而接踵者然嗟嗟蓋慕義懷貞風俗之隆所由來遠矣

李氏里民劉邦志妻邦志之卒也孤甫六月耳當是時劉門幾墮氏誓與孤共存亡孤孱弱提攜抱保日夕不得眠旣冠爲授室遂得抱孫曰自今可以衍劉宗矣氏天性勤儉泉衣布履雖做不易常以務本力學訓勉其嗣至孫鳳翥游於庠壽八十有五無疾終

邵氏崔崧繼妻崧初娶楊氏無出氏歸乃生一子方在髫鬢中而崧遽卒外侮內侵乘時迭至勢岌岌其殆氏毅然力持之卒能撫孤成立不失舊業聞者交贊曰女丈夫

王氏貢生李憲祖妻憲祖以文學重於邑中氏黽勉同心稱爲德配憲祖卒氏年二十九歲撫育孤子毀服飾親汲爨諸姑伯姊有過者見其戚戚之容森森之度咸欽佩焉

劉氏里民吳洸妻洸卒氏年甫十九子未及晬

有勸氏改適者曰覲顏再醮何以立天地急去
無污我耳嚼冰嚙雪閱二十二年而其子又亡
卒無悔意更嗣姪經德視如己出雍正二年六
十一歲以全節終經德亦哀毀如其所生云

趙氏里民沈鉞妻夫卒氏年二十有六孤彬文
生彌月貧苦無依誓死不二每霜天雪夜置兒
懷抱中手拈針線一縷一淚至乾隆元年苦守
三十二載其子彬文具陳母節知縣李翹爲之

請旌

邵氏儒士單家瑾妻性貞節言笑年二十八

家瑾卒遺孤碩膚方十歲每如洗無一椽以自

庇風妻露冷志益堅幸三子應運時給之然氏

十指作勞未嘗稍輟語詳應運傳中其教子森

森有法度既游庠督勉倍至遂登壬子賢書惜

不壽媳高氏亦撫三歲孤如金誓同守

單門又有劉氏者家瑛妻也家瑛卒時年二十

有八遺一孤艱苦殊甚或探其志指一老樹根

曰根不滅芽不絕奈何忍而剷諸六十四年冰

霜備歷鄉黨歎曰何單門之多賢母也

徐氏葉鑑妻鑑業儒不得志家甚貧氏于歸脫

簪珥操井曰絕無交謫聲閱七載鑑卒遺子二

長時泖纔三歲次時沛方周念宗祧爲重不可

死有欲奪其志者乃剪髮斷指以誓曰勤針績

倩鄰媪鬻之以供薪水子漸長令就傅謂曰汝

父讀書未食其報汝曹宜努力慰九京無空孤

寡母望也母子恒相對泣及雍正癸卯甲辰二

子果咸登文武鄉薦乾隆六年知縣洪肇楸具

詳旌表

張氏里民李鳳翔妻歸鳳翔善事舅姑鳳翔常
出貿易而氏定省視膳不以貧廢禮舅姑沒居
喪盡哀閱九歲而鳳翔卒遺孤經止三歲室無
長物氏恒篝燈辟繡漏三下不輟或爲隣代澣
濯以餬口然猶具束脩令其子入塾曰雖單寒
子可目不識丁乎乾隆六年知縣洪肇赫以里
人請具詳旌焉

吳氏里民趙之琇妻之琇卒年二十有二遺一

子一女俱幼貧無以給而匪石之心卒不可轉
風淒露冷聞子女呱呱聲則肝腸寸裂歷三十
五年教子入泮婚嫁畢頭皤皤成雪矣以壽終
子亦亡其孫瀝辭請旌焉

李氏里民趙岱妻雖生農家頗知大義年二十
九夫卒不忍棄孤子勞動成疾幾殆屬有天幸
得不死孤漸長氏彌老健隣人以為慶氏曰祇
苦未盡耳何慶為聞者嗟

趙氏廩生杜棠妻棠卒遺一子氏以慈母兼嚴

父每青燈熒熒兄弟侍立氏訓迪不倦嘗曰吾聞諸夫子聖賢立教只立個人模樣汝曹念哉年七十以壽終

傅氏庠生張翰子王儒妻也王儒累世儒素恒空乏及卒氏年二十四孑然一嫠親族無可倚者撫遺孤明德省衣衣之減食食之孤子無凍餒而氏之瀕於困絕者屢矣孤成童乃告之曰汝祖父清白一寒至此吾所以固守者懼辱先也汝其志之壽至七十一歲鄉里高其節操

劉氏里民陳光美妻夫亡年二十六家無寸土
頽垣破壁風雨蕭條氏念有七歲孤可依以守
也每乏絕令兒攜筐隨行挑野草以食拾枯枝
以薪如是者久之及孤應甲旣長乃治田氏親
董率焉今年已七十二歲矣苦守凡四十六年
汪氏里民王運興妻夫卒氏年二十八歲遺孤
詔過周歲纔二月耳二女亦尙幼氏左提右挈
堅守不移遇清明及十月朔必至運興冢哭奠
行道皆爲悽惻今氏年八十有五尙無恙其子

詔已五十有九矣

王氏里民高世亨妻夫卒年二十六遺孤方十月貧如洗親族以他適勸曰此寧人耶有死無二日夕嚮視唯冀孤無恙幸稍長使就傅爲具膏火資業儒未就督令務農曰耕亦本務也歷三十二歲年屆五十有八親族交口賢之

補

杜氏劉緝漢妻十八歲于歸閱十一年而寡無子以族姪湧爲嗣甫二周愛如已出稍長日督教之以冀其有成初緝漢沒窶甚舅姑俱年邁

或以氏無出諷去室氏曰吾去二老何依且劉
本支尙有人忍令先夫不祀耶卒留養二老以
天年終及壬子湧亦得成武舉今氏年已八十
矣

氏無子例入貞操緣湧遠出
志將竣始具報故附于末

論曰夫婦爲人倫首是以共姜伯姬之事特著
於經誠重之也洪惟

聖朝崇獎節義天下爭自濯磨而化行自邇畿輔之
地以節著者尤多焉豈獨如前志所云地屬幽
燕風氣剛勁使然耶抑聞明令胡與之有言伊

人完貞得其本心而已何必在旌以此知明時
之格於功令而有節未彰者比比也至

今日而請旌之疏朝上夕下遂使桑戶繩樞靡幽
不顯冰魂增色玉魄生香抑亦列女之幸也夫

列女卷之十三終